

LIVEL 8

EN MODULS

14.- 27.7.2024
ILANZ/GLION(GR)

CUORS
ROMONTSCH
INTENSIV

Gliendisdis, ils 15 da fenadur 2024

(10.55 – 12.30)

Modul 1A

Test da grammatica e specias da plaid

Daniel Pfister

Con fits eis ti ella grammatica? Nus fagein in pign test per controllar tiu stan actual. Aschia sas ti tgei temas grammaticals ch'ei fuss bien da repeter duront il cuors. Plinavon dat ei ina survesta dallas specias da plaid e nus fagein uorden cun substantivs, adjectivs e co.

Modul 1B

Tgei raquenta igl erizun alla steila?

Marisa Thöni

En quei modul scrivin nus ina historietta. Nus scaffin ina ficziun. Mintgin e mintgina scriva ina construcziun. Il vischin ni la vischina cuntinuescha cun ina secunda construcziun. Aschia havein nus alla fin dalla lecziun aschi biaras historiettas sco persunas che prendan part al modul. In excellent exercezi da scrire e forsa enderschis vus tgei ch'igl erizun ha raquintau alla steila.

Modul 1C

Protecziun dalla Patria

Martin Killias

Dapi siat onns ei Martin Killias president da Protecziun dalla Patria, l'uniun che s'engascha cun rodund 27'000 commembers* e donaturs* per la promoziun dalla cultura da construcziun. Pertgei duess ins proteger casas veglias? Ei quei mo ina damonda dallas valurs, ni datti autras bunas raschuns? En quei modul havein nus la caschun da cuntinuar ed approfondir il discuors che vegn moderaus sil podi a caschun dall'avertura dil cuors.

Mardis, ils 16 da fenadur 2024

Modul 2A

La Romontschia, il cuors: ils substantivs

Marisa Thöni

La specia da plaids dil substantiv ei enconuschenta a tuts. Nus savein che substantivs dattan num a creatiras ed a caussas concretas ed abstractas. Mo tuttina, co exact vegn il plural irregular formaus? E veramein, dat ei in plural collectiv en romontsch? En quei modul repetin nus exact quellas fuormas ed aunc dapli.

Modul 2B

Il dilemma cun las medias socialas

Daniel Pfister

Nus mirein ina revista dalla documentaziun da Netflix «The Social Dilemma» che sefatschenta culla problematica dallas medias socialas. In dossier tematic cun studis actuals e contribuziuns dad RTR dattan caschun dad elavurar, experimentar e discutir la tematica actuala e relevanta.

Modul 2C

La prosa da Guglielm Gadola

Renzo Caduff e Clau Solèr

El luvratori «La prosa da Guglielm Gadola» vegni dau in'investa en veta ed ovra d'in autur sursilvan fetg popular a siu temps. Nus lessen animar da puspei leger la prosa da Gadola. Perquei legin nus entgins texts marcants ed era zacontas marletgas da Paul Luziet, sefatschentein cul stil comic, expressiv e grotesc da quei roman exemplaric da Gadola, era el senn ch'el muossa co igl autur usurpescha tradiziuns culturalas e meina quellas *ad absurdum* exagerond e/u invertend ellas.

Mesjamna, ils 17 da fenadur 2024

Modul 3A

Cotschna, tgietschen, cotschens: igl adjectiv

Marisa Thöni

Cura dian ins tgietschen e cura dian ins cotschens? Il diever correct da quei adjectiv resta savens malguess. Enconuschent ei denton ch'ei dat adjectivs attributivs e predicativs. Mo tgei ha quei da far cul diever digl adjectiv tgietschen? Insumma, nua ella construcziun plazzein nus ils adjectivs? E co exact vegn igl adjectiv flectaus? Exact a quellas damondas duei quei modul dar risposta, aschia che tuttas malsegirtads sepiardan.

Modul 3B

Convivenza denter catolics e reformai

Daniel Pfister

En mia lavur da bachelor hai jeu perscrutau la convivenza denter catolics e reformai cun "Oral History". Jeu sun s'occupaus dalla damonda suandonta: "Co valeteschan ils habitonts d'Andiast e Vuorz la convivenza denter las duas confessiuns ils onns 1960-2020 en vesta alla cardientscha, veta da mintgagi e situaziun en scola?" Nus mirein communablein las rispostas dallas intervestas e discutein atgnas experiencias cun quei tema.

Modul 3C

Crappa da sulada

Linard Candrea

Ei va surtut per consolidar ed amplificar la prelecziun dalla sera avon, nua ch'il cudisch "Crappa da sulada – Pflastersteine" ei staus el center. Exempels concrets e texts cuorts (Il Dunant da Tersnaus/Il fastitgs da Grischuns ell'Italia e.a.) vegnan legi ed analisai. Il fenadur 1880 retuorna signur Padrun de Carné dall'Ucraina en sia patria. Igl um reh vegn retschevius a Sagogn, denter auter era cun ina poesia scretta d'in vischin. Quella vegn discussiunada da rudien.

Excursiun

Survesta dil program

Gl'ei vegniu exprimiu ils davos onns pliras gadas da saver far inaga in viadi ensemen cun ina persuna che savessi raquintar enzatgei dalla geologia en Surselva.

Igl ei gartegiau a nus dad engaschar Adrian Pfiffner per quei intent. El ei professur emeritau per geologia agl institut per geologia dall'universitad da Berna, ed ei denter auter era sefatschentaus culla geologia dalla Surselva.

Aschia meina il viadi dad uonn nus tras la Ruinaulta, da Versomi a Valendau, ni da Valendau a Versomi. Quei dependa. Da tgei?

Cuntinuaziun dalla survesta

Quei dependa, sche vus leis separticipar alla gruppa che va igl avonmiezdi naven da Versomi tochen Valendau, ni il suentermiezdi da Valendau tochen Versomi. Adrian Pfiffner fa numnadamein in viadi ensi ed in viadi engiu, pertgei ir cun ina gruppa da varga 40 personas tras la Ruinaulta, ei buc aschi sempel.

E tgei fa l'otra gruppa il medem mument? Lezza vegn menada dil guid da muntogna Frédéric Toggenburg da Valendau alla fueina che secatta mo rodund 1 km naven da Valendau direcziun Versomi, ni anavos.

Cuntinuaziun dalla cuntinuaziun

In guid da muntogna? Ei quei aschi malsegir? Na. Frédéric sa denton raquintar a vus ina massa dalla natira, e vegn era a mirar, tgei che vus saveis raquintar da quei che vus veseis. E lu dat ei aunc ina sorpresa suenter gentar. Tgei? Gliez ei ina sorpresa. Sche nus schessen, tgei sorpresa che nus fagein, lu fuss ei buca pli ina sorpresa. Perquei schein nus nuot. Sulettamein, ch'ei setracta dad ina sorpresa. E gliez ei uss schon buca pli ina sorpresa. E tuttina resta ei ina sorpresa. Tochen cuort suenter gentar. Ni duront gentar. Dependa con ditg che nus duvrein per barsar nossas ligiongias.

Modul 5A

Sin ni per romontsch? Ei va bein ni bien?

Daniel Pfister

A quellas damondas eis ei buc adina schi sempel da rispunder. Nus sefatschentein per quei motiv cullas particlas e s'approfundein ella teoria, exempels ed exerchezis. Il diever correct dils adverbs e dallas preposiziuns ei numnadamein decisivs per discuorer in bien romontsch.

Modul 5B

La pressa romontscha el decuors dil temps

Marisa Thöni

La pressa romontscha ei stada (ed ei aunc adina) da gronda impurtonza per la formaziun dall'opiniun publica en Romontschia. Communablamein elaborein nus ina survesta da quella pressa. Sco exempel practic perscrutein nus rapports dall'elecziun dil sulet cusseglier federal romontsch, Felix Calonder, digl onn 1913.

Per nies divertiment lein denton era dar in'egliada sillas reclamas e mirar co lezzas ein semidadas el decuors dil temps.

Modul 5C

Luvratori da teater

Angela Collenberg

En quei luvratori schluitein nus el mund da teater ed improvisaziun cun differents giugs ed exerchezis. Nus lein experimentar cul lungatg e differentas rollas per aschia activar nossa vart creativa. Ei drova negina experienza en teater. El center stat il plascher d'empruar ora.

Modul 6A

Dialects ed il svilup dalla grammatica

Daniel Pfister

Ils dialects ein in mund per sesez ed in tema che fascinescha mei taluisa che jeu vi intercurir quel en mia lavur da master. Bunamein mintga vitg ha sias atgnadads foneticas ed atgnas expressiuns. Mo quellas specialitads s'accordan savens buca culla grammatica da scola ufficiala. Nus dein in sguard sils dialects enteifer il sursilvan ed ella historia dalla grammatica sursilvana.

Modul 6B

Tgei via pren il turissem sursilvan?

Marisa Thöni

Il resort dils Belges «Acla da Fontauna» a Mustér ei historia. A Breil vegn il resort «La Prada» menaus cun grond success. En quei fratemp ei il proxim project impurtont semtgaus: Ella vischnaunca Tujetsch duei il «Resort Dieni» vegnir realisaus. Ein gronds resorts da vacanzas veramein il recept da success per igl avegnir turistic en Surselva? Nus empruein dad anflar rispostas.

Modul 6C

Viseta el Löwenberg a Schluein

Simona Hendry e Daniela Demarmels

Simona Hendry meina nus tras la historia dil casti da Löwenberg ch'ei vegnius construius enamiez il 12avel tschentaner dalla famiglia «von Löwenberg». Oz survescha quel alla «surselva impact lab» sco dimora per interpresas giuvnas e per artists*.

Daniela Demarmels ei ina dallas artistas che ha siu atelier el casti. Sia pissiun ei malegiar e luvrar cun arschella. Nus havein la caschun d'emprender d'enconuscher l'artista e siu art.

Mardis, ils 23 da fenadur 2024

Modul 7A

La grammatica dalla construcziun

Daniel Pfister

La sintaxa sefatschenta culla posiziun dils plaid en ina construcziun. Per exempel dalla damonda nua ch'il verb vegn posiziunaus:

Flurina *scriva* oz in sms a Carla.

Oz *scriva* Flurina in sms a Carla.

A Carla *scriva* Flurina oz in sms.

Cun teoria, exerchezis e discuors empruein nus d'applicar la structura correcta ella construcziun.

Modul 7B

La veta professionala oz - ier - damaun

Marisa Thöni

Oz astgein nus beneventar la cussegliaadra da professiuns *Annette Decurtins* tier nus. Ella dat investa a nus en sia lavur da cussegliaziun.

Co ein sia clamada ed ils basegns da sia clientella semidai?

Nus fagein patratgs sur dalla veta professionala dad ozildi, dil vargau e dil futur. Per facilitar igl access a quella discussiun, elaborein nus ordavon scazi da plaid ord il mund dalla lavur.

Modul 7C

Palaver for ever – Satira

Roman Caviezel

En ina emprema part vegnin nus ad emprender d'enconuscher igl autur ed anteriur scolast gimnasial Roman Caviezel en in discuors moderau. En quella part prelegia el era entgins da ses texts ord l'ediziun 'Palaver for ever' che la Casa editura romontscha ha publicau dacuort.

Suenter il caffè vegnin nus a sededicar alla teoria ed analisa dils differents elements dalla satira classica, avon che nus applichein quels en texts cuorts che nus scrivin nusezs.

Modul 8A

Repetiziun dils temps grammaticals

Daniel Pfister

Ei fuva inagada ina persuna ch'era s'annunziada pil cuors romontsch. Il temps era s'avanzaus, aschia ch'ella ha stuiu s'enscriver per in modul dil level 8. Co vegn ella a sedecider?

En quei modul repetin nus tuttas fuormas dils temps grammaticals: present, perfect, imperfect, plusquamperfect, futur e futur exact. Plinavon exercitein nus d'applicar la dretga fuorma en dialogs.

Modul 8B

Viseta dalla Cuort Ligia Grischa a Trun

Marisa Thöni

Tgi enconuscha il project TiM-TandeM? Exact, ils paucs! Sclariment dat a vus ina viseta el museum Cuort Ligia Grischa a Trun. Vus haveis igl entir museum a vossa disposiziun per tscharner in object preferiu. Silsunter inventeis vus sco tandem ina historia davart quei exponat. Ei dat schizun la pusseivladad da publicar vies text sin la pagina da museums TiM-TandeM. Nossa viseta entscheiva cun ina tura guidata, suenter haveis vus maun liber per vossas scuvretgas.

Modul 8C

Ladin dolomitan

Nadia Rungger

Nus survegnin viseta da Gherdëina (Gröden), Tirol dil Sid. L'autura Nadia Rungger introducescha nus el ladin dolomitan, in lungatg retoromontsch che ha sco il romontsch dil Grischun era tschun idioms ed in lungatg unificau. Nus cumparegliein ils differents idioms ladins cun nos idioms, e tedlein cun bucca e nas, cura che l'autura dat in schatg da sia litteratura ch'ei vegnida undrada cun biars differents premis (ladin dolomitan e tudestg).

nadiarungger.com

Gievgia, ils 25 da fenadur 2024

Modul 9A

Ella di, che ti siemies schizun per romontsch

Marisa Thöni

En quei modul va ei buca pils siemis, mobein pil conjunctiv. Il tetel tradescha gia: Ins fa diever da quei modus pil discuors indirect. Ei quei gia tut? Na, quei fuss bunamein memia sempel, sch'ei dess mo quei diever. Cul conjunctiv havein nus era la pusseivladad dad exprimer in giavisch, ina voluntad, ina speranza ni ina supposiziun. Jeu manegel pia, che quei seigi in tema grammatical fetg interessant.

Modul 9B

Europeada e minoritads linguisticas

Daniel Pfister

L'Europeada ei in turnier internaziunal da ballapei dallas minoritads linguisticas dall'Europa. Uonn hai jeu astgau separticipar a quel cull'equipa dils Romontschs*. La finamira da quels turniers regulars ei il brat denter las differentas culturas e da renconuscher la diversidad ell'Europa. Era nus lein nezegiar quella plattafuorma per dar in sguard sin autras minoritads linguisticas dall'Europa.

Modul 9C

Luvratori davart il scriver

Jürg Gautschi

En quei luvratori raquenta Jürg Gautschi da siu scriver, da muments inspironts, da vias tschoccas, dil cletg, da strategias e modas da vegnir tier material, da proceder e dar fuorma, dad analisar, condensar, focussar, alienar, dinamisar, ritmisar. Tut quei cape-ta cun ina «surprise» performativa sur dad in niev project litterar, cun raquintar dil process, da strategias e tecnicas da scriver partend da singulas historias ord il cudisch Cunterfem, cun animar a moda ludica da sez/za scriver e preleger (sch'ins vul) e discutir.

Venderdis, ils 26 da fenadur 2024

(9.00 – 11.40)

Modul 10A

Ils modus cundizional ed imperativ

Daniel Pfister

Ei dat quater modus: indicativ, conjunctiv, cundizional ed imperativ. En quei modul da grammatica sefocussein nus sin dus.

Sche jeu savess, visitass jeu tut ils moduls il medem mument.

Sedecida!

Modul 10B

Aua: sur da fontaunas e curas

Marisa Thöni

Haveis vus gia fatg patratgs davart il gust dall'aua? Ei aua buca simplamein aua? En quei modul perscrutein nus differents aspects da l'aua. Nus legin raquens sur dall'aua, rimnein locuziuns e tedlein ina contribuziun da RTR sur da fontaunas e curas. Per finir fagein nus ina degustaziun dad aua. Sil pli tard lu vegnin nus ad encorscher, che aua ei buca simplamein aua.

Modul 10C

La relaziun denter lungatg e patertgar

Andrin Büchler

Ha il lungatg che nus discurren in effect silla moda co nus capin nies mund?

Tgei consequenzas havess quei, sch'il tudestg svizzer avanzass pils Romontschs* ad in lungatg dil cor?

Cun pliras teorias, pigns experiments e discussiuns introducescha Andrin Büchler nus en ina tematica che savess esser in indicatur valeivel pigl avegnir dil romontsch.